

BOŠNJAČKO NACIONALNO VIJEĆE
11. maj – Dan bošnjačke nacionalne zastave
Svečano podizanje nacionalne zastave Bošnjaka na jarbol
Novi Pazar, 11.05. 2018. godine
Plato ispred Glavnog ureda Vijeća, 19:30h

Obraćanje dr. Sulejmana Ugljanina, predsjednika Vijeća

Poštovani, dragi građani Sandžaka, dragi Bošnjaci čestitam vam Dan bošnjačke nacionalne zastave.

Bošnjaci kao autohton narod koji vijekovima živi na ovim prostorima ima sve elemente naroda. To smo i danas pokazali i danas zajedno sa svim ostalim narodima koji žive u Sandžaku i sa kojima vijekovima dijelimo i dobro i neke teškoće, i danas zajedno dijelimo radost, povodom velikog bošnjačkog blagdana - Dana bošnjačke nacionalne zastave. Kao što vidite ove dvije mlade i uspješne djevojke koje imaju uspjehe svjetskog ranga, djevojke iz Sandžaka gdje, u južnom i sjevernom Sandžaku, nas ima nešto preko 529 hiljada stanovnika, imaju uspjeha koje nemaju neke države od 50 miliona stanovnika. To govori da smo kvalitetni.

Zašto su ovdje ove naše mlade djevojke, zato što hoćemo da pokažemo čitavom svijetu da budućnost pripada mladim, hrabrim, odvažnim i ustrajnim.

Kao predsjednik BNV nisam se davno osjećao bolje i ponosnije, nego danas kada samo dobio priliku da podignem zastavu sa ove dvije mlade i uspješne djevojke pred kojima je sportska i ljudska budućnost.

Evo ovo je 27. put kako dižemo ovu zastavu, 27 punih godina.

Svih ovih 27 godina kroz sve institucije sistema učinili smo mnogo da stvorimo pravni okvir za ono što danas imamo. Znači da mi Bošnjaci držimo do svog bošnjačkog i sandžačkog regionalnog identiteta. Mi smo evropski narod, koji evropski misli, evropski živi i evropski radi i koji sa svim drugim narodima činimo bogatstvo u jedinstvu različitosti. To nas čini sretnim ali zaista to mogu sa ponosom da kažem da mi Bošnjaci sa svojom kulturom i svojim identitetom i svim svojim vrijednostima činimo bogatstvo za sve one koji žive sa nama.

Ovo jeste vrijeme da se kažu neke krupne riječi, ali ne želim da držim velike govore, kazat ću da očekujem da mi skupa sa našim legitimnim predstavnicima, narodnim poslanicima, predsjednicima opština, vijećnicima, intelektualcima, da svi zajedno izdržimo još ovih, kako to Ajla u boksu zna „zadnjih deset“, onih zadnjih deset sekundi kad je čovjek umoran, ali toliko mu fali do pobjede. I mi Bošnjaci imamo pred sobom „zadnjih deset“. Znači da kao konstitutivan narod budemo ugrađeni u ustav i Republike Srbije i Crne Gore, to prvo.

Da Sandžak bude ugrađen u Ustavu, i jednom i drugom, u skladu sa odlukama Referenduma o potpunoj političkoj i teritorijalnoj autonomiji Sandžaka sa pravom priključenja jednoj od suverenih republika.

Građani Sandžaka, njih više od šezdeset posto onih koji su na referendumu glasali za autonomiju Sandžaka, danas žive u evropskim zemljama. Bili su prinuđeni, ne ponovilo se, da pod pritiskom državnog terora, napuste svoju zemlju samo zato što su rekli da ne žele da ratuju, ali hoće da na civilizovan i demokratski način, na referendumu kažu u kakvoj državi žele da žive.

I ono što sam malo prije rekao, da budućnost pripada mladim, hrabrim, odvažnim i ustrajnim, ova naša ustrajnost dovela nas je do ovdje da danas učestvujemo u evropskim integracijama, u izradi pravnog okvira za manjine, u reformi političkog sistema i Srbije i Crne Gore. Da Bošnjaci konačno dobiju sva ona prava koja im pripadaju, uz pomoć dobronamjernih intelektualaca i iz srpskog naroda, iz crnogorskog naroda, iz albanskog naroda i svih drugih koji žive u Sandžaku, da i Bošnjaci konačno Ustavom dobiju svoje tlo pod nogama. To je onih „zadnjih deset“.

Malo će mi zamjerit moji prijatelji naši, predstavnici opština, i gradonačelnik Novog Pazara i predsjednici Tutina, Sjenice, Rožaja, svih gradova sandžačkih koji su prisutni ovdje, što ne govorim o ekonomiji, kažu i ekonomija je važna. Tačno, važna je, ali svi su dobili nacionalnu državu na Balkanu osim Bošnjaka. Kada Bošnjaci to riješe, onda ćemo i mi sto posto da razmišljamo o ekonomskom razvoju, a sada moramo pola pola, o autonomiji i nacionalnom statusu i o ekonomskom razvoju.

Malo preozbiljna tema za ovakav skup, ja ću sa ovim da završim, da poželim svim građanima Sandžaka ljepši život, bolju životnu perspektivu, a svima onima koji su u Evropi nek izdrže još malo, sve ovo za šta smo glasali sve ono za šta smo se legitimno izjasnili ostvarićemo.

I za kraj još jednom Bošnjaci, sretan vam ovaj praznik, Dan bošnjačke nacionalne zastave,

Esselamu alejkum.